



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma : Tir Yimyim

tiryimyim@aolima

tir yimyim

TAPAK 4

Asian Games: Parul-i gold aser Arjun o Sunil nati bronze angu

PM Modi-i Chhattisgarh nung sen crore 27,000 alang project sayatsü



VOL. XX NO. 353 (ADOK 353) DIMAPUR RASEMNÜ (WEDNESDAY) MONGPUTENI (OCTOBER) 04, 2023 ₹ 5.00

Tesayurtemi lungkak aitba sota atar: CANSSEA

Dimapur, October 3, 2023 (TYO): Mongublarnü Confederation of All Nagaland State Services Employees Association (CANSSEA)-i All Nagaland School Teachers Association (ANSTA), Nagaland Government Higher Secondary School Employees Association (NGHSSEA) aser All Nagaland Government Primary Teachers Association (ANGPTA) den külem senden ka menogo. ANSTA, NGHSSEA aser ANGPTA ajanga sorkar dang tesayurtem nem mapang shitak nung itasen agütsüsü mepishiba

sülen School Education Principal Director-i September 25, 2023 nü sorkar mapa inyakterem dang Disciplinary Rules tekümdangtsü metetdaksüba sülen CANSSEA-i iba senden ayonga amen. Tanü senden nung CANSSEA-i bangdakpurtem den jembiteptsü aser tekaratiba nung ken o angatetteptsü nangzükba nung ajemdaker ANSTA, NGHSSEA aser ANGPTA ajanga lungkak aitba thinena atatsü telemetba agiogo, ta CANSSEA President Dr. Ilang-i sangdong ka nung ashi.

CNTC-i Minister Imna Along o ashishir

Dimapur, October 3, 2023 (TYO): Higher Education & Tourism Minister Temjen Imna Along-i National Youth Peace Convention nung Central Nagaland Tribes Council (CNTC) luja jembiba magizükba metetdaksüogo. Minister Along-i Naga nunger longjemtsü ayongzükba jembidang par kibong lutsüba atema sasaa bilemer. MLA kati yamai jembiba

ya pa tera amadokba ama lir, ta Media Cell, CNTC sangdong ka nung ashi. CNTC-i ayongba sendentem nung denaka CNTC tentetba aser inyaksangshi amadokba MLA tem den onoki tongteprateptsü. Asenok kibong ka ama külemi aintsü aser Naga loktiliba longjemtsü atema onoki parnok den nenshia jembitsü Media Cell, CNTC-isa metetdaksü.

ULFA (I) züngsem 2 tasüba agi merenshi



Guwahati, October 3, 2023 (Agencies): ULFA (Independent) ajanga parnok tanishir Lachit Hazarika (Brigadier Salim Asom) aser züngsem Bornali Asom (Nayanmani Chetia) na nem tasüba temerenshi agütsü tepsetgo. Lachit Hazarika ya ULFA(I) tanishisang Paresh Baruah den tesentaktep tajung liasü aser pai 1990s nung ULFA(I) züngsem aküm. Külen Bornali-i 2021 nung ULFA(I) nung aden ta osang angazüker. Myanmar kübok Sagain tesem nung aliba Hachi camp nung September 20 nü Lachit Hazarika nem tasüba temerenshi agütsü. Külen ULFA(I)-isa Tinsukia nungi boxer Bornali nem-a tasüba temerenshi agütsü. Lachit Hazarika aser Bornali Asom nati ULFA(I) temzüng aser inyakyim anema inyaksangshi. Tenati Indian intelligence forces den yaritep aser külem züngsemtem prangpong-injang bener tsükchir tsüingdang temai adoktsü ajungmeso inyak, ta ULFA(I) ajanga yokba email ka nung ashi. "Tesep toktsür jena aoertem (ULFA-I züngsemtem) apuba, parnok apudak tepsetba aser okadaki anir maoba indang osang tejangja ashitsü melena tenati (Lachit aser Bornali) nati temaba ketdangsurtem dang züngsemtemji Assam Police den taila khatepdang

asü ta osang tiyazü ashi" ta parnokisa metetdaksü. "Tena ya Assam Superintendent of Police level officers aser Indian Army officers ajanga mesüzük aser parnok ULFA-I indang prangpong-injang aser radios samatsütsü tasa atong" ta ULFA(I)-isa ashi. Tenatisa tsükchirtem dang ULFA(I) züngsemtem senzüba miim lenmang osang sangoktsü aser züngsem tasentem dang item lenmang ajanga jena aotsü ajungmeso ta parnokisa ashi. "Bornali Asom dang asüingdangya asüingdang lai Assam Police aser Army den tesentaktep tajung aliba nangzük aser 2023 nung iba kuliji angu anungji la nem tasüba temerenshi agütsü" ta ULFA(I)-isa email nung shia lir. Lachit Hazarika-i ozüing alema mapa aika inyakba atema aitsüba sülen pa jenjang ajemtsür headquarters nung mapa lezmüksü. Ajisüiaka pai telok anema mapa maneni inyakba atema United Liberation Forces of Assam (I) indang General Bench ajanga September 20, 2023 nü pa tepsettsü lemtet agi, ta parnokisa metetdaksü. ULFA (I) ajanga iba sangdong agütsüba sülen ghonda ishika lir Assam DGP GP Singh-i ULFA (I) dang Lachit Hazarika (Brigadier Salim Asom) aser züngsem Bornali na temang pei pei kibong ket nung agütsütsü metetdaksüogo.

Intanki National Park kümzükba ayutsü bangjemtepogo



Department of Forest aser Intanki National Park meketa aliba yimtsüng 16 tsüingda MoU nung sign sütepba sülen agiba noksa ka angur.

Dimapur, October 3, 2023 (TYO): Wildlife Week Celebration-2023 amongba tenüng nung Department of Forest aser Intanki National Park meketa aliba village council 16 tsüingda Memorandum of Understanding (MoU) ka nung sign sütepogo. Intanki National Park kümzükba ayutsü aser süngdonglidong den shirurtem wazüka ayutsü atema parnok tsüingda nangzüktepogo. Mongublarnü Intanki National Park nung "Partnerships for Wildlife Protection" omen nung ajemdaker Wildlife Week sentong ka agidang MoU nung sign sütepogo. Iba MoU nung Department of Forest, Environment & Climate Change Commissioner & Secretary Y. Kikheto Sema, Chief Wildlife Warden Ved Pal Singh aser village council züngsemtemi sign sütep. Yimtsüng 16 ji Beisumpukam, Jalukiekam, Pajjol, Songngou, Monglumukh, Pellang, Vonkitem, Lilen, New Beisumpui, Bongkolong, Nsenlwa, Khelma,

New Soget, Ikeisingram, New Nkio aser Sailhem lir. Department-i Intanki National Park temeket nung aliba yimtsüngtem nung eco-developmental activities inyaktüsü aser lanurtem nem training aser human resource development ajanga mapa agütsütsü ta MoU nung lateta lir. State sorkar aser department den yaritepa Park wazüka ayutsü, shikari masütsü aser pei pei yimtsüng nung shikari aser ozüingi memelaba inyakyim noktangtsü atema MoU nungsa shia lir. "Nagaland sorkar indang ali 5% dang lir aser süngdonglidong den shiruru wazüka ayutsü atema nübertem teyari nüngdaker. Yimdaklir aikati arem shiruru wazüka ayutsü tangatetba aruogo aser community conserved area (CCA) 134 ajanga pei pei li nung arem shiruru kümzükba ayutsü tenla agütsüogo" ta Commissioner & Secretary Y. Kikheto Sema-i o jembidang ashi. "Intanki ya linük meyong lir aser asenoki lokti, sorkar aser nodal department yaritepa iba park

kümzükba ayutsü bangjemteptsüla" ta paisa ashi. "Naga nunger aser talisa park temeket nung aliba yimtsüngtemi sorkar den amalitep alitsüla aser Intanki National Park ya Eco-tourism, Wildlife Safari ama kümdaktsütsüla. Iba ajanga mapa inyaktüsü maongka angutsü aser rongsenketzüng ajungkettsü" ta Kikheto-isa ayongzük. Nagaland Baptist Churches Council (NBCC)-i parnok kübok aliba Associations ajak dang pei pei arogo nung Wildlife Week indang osang prokshitsü tetuyuba agütsüba ateam kanga pelar, ta paisa shisem. "Public teyari medeni administration, police aser department ajanga dangbo alizüngbo metongtetsü. Asenok ajak teka longjemer arem shiruru kümzükba aser wazüka ayutsü mepishir" ta Chief Wildlife Warden Ved Pal Singh-ia ashi. "Asenoki Intanki National Park wazüka yura Nagaland tali renloksü aser safari oteba tourist spot ka kümdaktsütsü koka lir" ta paisa ashi.

Assam nung question paper temai adokba atema temerenshi tulu alitsü

Guwahati, October 3, 2023 (Agencies): Assam state-level tatidang balala indang question paper temai adokba inyakyim aziüoktsü atema state sorkari ozüing tasen ka yanglutsü. Iba ya Assam Public Examination (Measure for Prevention of Unfair Means in Recruitment) Ordinance, 2023 lir aser iba ajanga aibelenertem küm 10 tashi tepuokdak ayutsü aser Rs 10 lakh nungi Rs 10 crore tashi senchi alitsü. India nung public exams aziüoktsü atema iba ama ozüing tesashi yangluba ya Rajasthan sülen state tanabubaji Assam lir. July 22, 2023 nü Rajasthan nung Rajasthan Public Examination (Measures for Prevention of Unfair Means in Recruitment) Act, 2022 latetogo. Hombarnü Gandhi Mandap nung Chief Minister Himanta Biswa Sarma menden ser cabinet senden amendang iba ozüing agizükogo. Assam Public Examination (Measure for Prevention of Unfair Means in Recruitment) Ordinance, 2023 nung section 10(2) ajanga küm 5 nungi 10 tashi tepuokdak ayutsü, Rs 10 lakh nungi Rs 10 crore tashi sen achitsü aser senchi magütsüra küm 2 talila tepuokdak ayutsü

lateta lir. Candidate temelen yokba, question paper temai adokba, question paper temai adoktsü merangba, question paper ayoktsü/menüingtsü (print) merangba, question paper asoshi telangzükba agütsü merangba, designated centres nung masüba tangalen tatidang agiba, question papers/blank answer scripts designated printing press nung memeningba amala iba Ordinance ajanga temerenshi alitsü. "State sorkari yakta iba ordinance mapa tenzüktsü atema sangdong ka agütsütsü. Taruba Assam Assembly session nung onoki iba bill ka benoktsü" ta Education Minister Ranoo Pegu-ia ashi. "Iba ozüing ajanga question papers temai adokba aser public examinations nung tim masüba aziüoktsü aser noktangtsü. Iba nung autonomous bodies, authorities, board corporations dena lir aser special court trials agütsütsü" ta Minister Pegu-isa ashi. Iba Ordinance kübok Assam Public Service Commission (APSC), Gauhati High Court, State Level Recruitment Commission for Class III Posts, State Level Recruitment

Commission for Class IV Posts, Board of Secondary Education Assam (SEBA), Assam Higher Secondary Education Council (AHSEC), State Level Police Recruitment Board, Teachers Eligibility Test for LP and UP Schools, Teachers Eligibility Test for Secondary Schools, Medical and Health Recruitment Board, Assam Engineering Service Recruitment Board, Assam College Service Recruitment Board, state sector PSUs ajanga agiba tatidang ajak aser ano state-funded universities, societies, corporations, local bodies ajanga agiba tatidangtem adentsü. Tesüiba küm asem tsüingda Assam nung question paper temai adokba tatalokba ana ajuruogo. March 11, 2023 nü Board of Secondary Education, Assam (SEBA) ajanga agiba High School Leaving Certificate (HSLC) exam nung General Science indang question paper temai adok aser iba ajanga SEBA-i tatidang athitsüsa aküm. September 20, 2020 nunga State Level Police Recruitment Board (SLPRB) ajanga sub-inspectors (SI) mapa 597 asoshi written test indang question paper temai adokba ajanga SLPRB-i tatidang tenzük minute ishika dang lir tatidang thinena liasü.

Ao Kaketshir Telungjem Kohima lokti senden menogo



Molu Ki, Kohima nung October 2, 2023 nu Ao Kaketshir Telungjem Kohima lokti senden amendang tangokba noksa ka nung AKTK ketdangpur tasentem angur.

Dimapur, Mongputeni/Oct. 03 (TYO): Ao Kaketshir Telungjem Kohima (AKTK) lokti senden aser Students Day sentong October 2, 2023 nu Molu Ki, Kohima nung agia liasü.

Iba sentong nung tongti o jembir Engineer in Chief, Power, Er. Moa Aier-i sorkar mapa nung kisiung metaloka malitsü indang shia liasü.

Pei sempet jangjateta, mapang indok mesasai mera tajung nung tashi indoktsü kanga

tongtipang lir, ta pai ashi. Yamaji inyakra, pei alitsü asoshi resources adokdaksütsü aser sorkar teyari nung metaloka aliba ajemtsü, ta ashi.

Iba sentong nung HSLC aser HSSLC toppers nem sempet agüja liasü.

Kasa sentong nungs Ao Kaketshir Telungjem Kohima nung 2023-25 kümsük asoshi ketdangpur tasen yamai shima liasü: President - Sentilong; Vice President - Limatemsu Jamir;

General Secretary - Moasunep; Assistant General Secretary - Sentinaro; Information Secretary - Sentilong Yaden; Cultural Secretary - Imsenkumla Lemtur; Finance Secretary - Ayimer Jamir; Assistant Finance Secretary - Sunep L Imsong.

Sentong tenzüka Vice President, AKTK, Takusunep Imchen-i tarur pela agizükba o jembi aser General Secretary, AKTK, Meyipong Kichu-i melepzüng o jembia liasü.

Rotary Club Mokokchung-i tesayurtem nem tetushi agutsü



Rotary Club Mokokchung-i tesayurtem nem tetushi senpet agutsüba sentong nung Rotary Club Mokokchung lenirtem aser senpet agizüker tesayurtem külemi tangokba noksa.

Mokokchung, Mongputeni/October 3(TYO): Rotary Club Mokokchung-i October 3 aonung tesayur pongu nem tetushi sempet Nation Builder Award agutsüogo.

Kin ka yangluba nung shilem tulutibaji tesayurtemi agir aser takum iba dakji rangloker tanurtem dang lenla ajak nung abensa takok ngua tenzüka repringteta Rotary Club M o k o k c h u n g - i G o v t . H r . S e c . S c h o o l Mongkolemba nungi S.Imnajungshi Changkier, Eden Academy Mokokchung nungi Tianaro Longkumer, Merachiba Memorial Govt.High School Merangkong nungi Limachawa,

Christian Residential Hr.Sec.School Mokokchung nungi Obanglemla aser Baptist Hr.Sec.School Mangkolemba nungi Merangnaro parnok nem tetushi nungyu kuli kaket(certificate) aguja liasü.

Iba sentong nung Senior SDEO Mkg. Jonglemdong Longkumer-i t tetushi tejaoker o jembidang tesayurtemji kin ka yanglurtem lir, kechiaser tesayuri sayutetba kaketshirtemji tarutsü putu asoshi teiemla lirta ashi.

Senior SDEO-isa tesayur pai sayuba tanurtemji pei school ki takdang telungi aitdir tanur ajakji pei chir ama meima sayuba ajanga alima nüburtemi tesayurtem nem tetushi

tematibaji agutsür.Aji asünung tesayurtemi iba tetushi tuluji khuret ka ama agizüka alimai yimlaba ama kin yangluba nung tongti shilem agiba angateta tesayuba mapaji inyanganta adenshia aliba tesayurtem ayongzüka ashi.

Iba sentong nung atenerem saksalemdakja Eden Academy nung azünger kaketshirtemi ken tajung ka aten aser Literary Committee,Chair Rtn.I.Temsü Jamir ajanga achayanga tesayurtem nem konang senpet agutsü den Rtn.Rongsentoshi Jamir-i tepela o jembi aser Rotary Club Mokokchung Tir Rtn.Tiarenla Ketdangstüba nung iba sentong agi.



24 Angetyongpang NDPP Longmisa unit pur wako atsüketba sentong ka Oct 3, 2023 nu agiba mapang tangokba noksa nung angur. Iba sentong nung 24th AC, Secretary Region, Women Organization, Youth Organization, züngsemtem aser Longmisa nungi temulungertem aden. 24th AC President, Nungshimayang-i wakoji atsüket aser Rev. T. Toshi, Pastor LBC den temoatsü meshia sarasadem. Iba sentong nung unit ajak nungi tejembir balalai party tenzükertem lungjema party tangatetba shitak alitsü asoshi ajungshitepa liasü.

Dimapur Ao Lanur Telungjem-i pelaba lemsateper

Dimapur, Mongputeni/Oct. 03 (TYO): District Hospital Dimapur nung October 2, 2023 nu Voluntary Blood Donation Camp takok ngua agitetba asoshi shilem agirtem, azü tenlartem aser volunteers tem dang kanga pelaba lemsateper, ta Dimapur Ao Lanur Telungjem (DALT) sangdong ka ajanga ashi.

Iba sentong ya ajanga telungjem tanüla sayur aser nisung takum kumzüksü asoshi bendanga agütsür inyakba sayur, ta sangdong ajanga ashi.

Blood Bank, District Hospital Dimapur den lungjemer ayongzüka voluntary blood donation camp nung züngsemtem aser Dimapur nung alirtemi temolung süa telangzüba agüja azü tenlaogo.

Tang ama timtem balala aliba aser dengue tashidak jateta azü kanga nungdaka aliba ajiteta iba sentong ya ayongzüik.

Iba camp nung azü tenlar aika aruba ajanga Aor temi dangar

ajungtsü asoshi yaritsü molunga aliba ajiteter.

Item azü yagi mozüki aser clinic balala nung nungdaka aliba shiranger nem tongtipang teyari agütsütsü, ta DALT sangdong ajanga ashi.

Iba sentong yagi temeim, dangar asoshi aria bilemba aser telungjem sayur, koba meimchir tenzüka nung DALT-i metsünga-reta amshir.

Nodal Officer, Blood Bank, District Hospital Dimapur, Dr Temsu Ao-i anir healthcare professionals, volunteers aser partners temi anibelem mesasai iba sentong takok angutsü asoshi inyakba atema DALT ajanga pelaba lemsateper, ta ashi.

Parnoki bendanga agütsür yaritepba ajanga azü tenlaba maparen jangratema inyaktetogo.

Nüburtem ajungtsü asoshi aser talisa Dimapur nung alirtem atema DALT ajanga maneni maparen balala inyaktsü, ta sangdong ajangasa ashi.

Kohima nung State Level Youth Festival agiogo



(Achichilen) Folk song competition nung takok angur (Kohima district) aser (abelen) folk dance nung takok angur (Peren district) den Advisor, Youth Resources & Sports, S. Keoshu Yimkhiung noksa nung angur.

Kohima, Mongputeni/Oct. 03 (TYO): Department of Youth Resource & Sports, Nagaland ajanga October 3, 2023 nu Indira Gandhi Stadium, Kohima nung State Level Youth Festival ayongzüka liasü.

Iba sentong nung district 11 nungi lanur 299-i sobaliba ken aser tsüngsang nung toktepa liasü.

Sobaliba tsüngsang (Folk dance) tetoktepa nung Peren district ajanga mezüngbuba jenjang ngutet, Zunheboto aser Mokokchung district temi tanabuba aser tasembuba jenjang nguteta liasü.

Sobaliba ken (Folk song) tetoktepa nung Kohima district-i mezüngbuba jenjang ngutet, Phek aser Mokokchung district-i tanabuba aser tasembuba jenjang nguteta liasü.

Folk song aser folk dance nung takok angur temi taruba küm January 12 nu National Youth Festival nung Nagaland state tenüng nung shilem agitsü, ta Director, Youth Resources & Sports, Kethosituo Sekhose-i metetdaksü.

Iba benjong tembangba sentong Advisor, Youth Resources & Sports, S. Keoshu Yimkhiung-i moatsü aser takoker nem senpet agüja liasü. Pai iba sentong nung jembidang, Youth Festival ya südoksünem mesüra tetoktepa

kisüng masü saka nükjidong tuluba lir, ta ashi.

Iba amala benjongmung yagi lanurtem nem pei sempet sayatsü maongka agütsür, pei tejangraba meteter, aser sapang alema oa jenjang tulu aliba lesson tem angazüker, ta pai ashi.

Iba nung pai lanurtem dang maongka agia temaba jenjang ajangtetba nung amshitsü ayongzüka liasü.

Shilem agirtemi iba benjongmung tajungtiba nung mungtettsüsa bendanga agütsür meranga inyakba atema pai tentüngsang agüja liasü.

Lanurtem dang iba benjong nungi angazüka ano dangartem dang sayutsü aser parnokia amshitsü Yimkhiung-i ashi.

"Takok ya aseni jong anguba kisüng agi masadanger. Iba nungya pei takum renlokba, tensa balala koktettsüsa yangerba aser asen alidak mapa tajung inyakba densema lir," ta pai ashi.

Iba benjong tenzüka sentong nung menden Chubarenla Longchari, DYRO liasü aser benjong tembangba sentong nung menden Megolhu Dolie, Additional Director, Youth Resources & Sports liasü.

Sentong tembanga melepzüng o Jakedovo Chase, Deputy Director, Youth Resources & Sports ajanga jembia liasü.

PM Modi-i Chhattisgarh nung sen crore 27,000 alang project sayatsü

New Delhi, Mongputeni/October 3 (Agencies): Ato Kilonser Narendra Modi-i Mongolbarnü Chhattisgarh nung sen crore 27,000 alang development project tem atema nungshilong azüngtsüogo, aser iba den Nagarnar nung NMDC Steel Ltd indang steel plant ka semzükja liasü.

PM Modi-i, Nagarnar nung steel plant ka semzüksü, koba sen crore 23,800 dak tema intoka yanglua liasü. Steel plant ya greenfield project ka lir aser iba plant nung jenjang aketba steel yanglutsü.

Paisa, linük kübok kinü kisang ajak renlokba sülenang developed India nükjiding ataloktsü, ta ashi.

"Tanü sen crore 27,000 dak tema ala development project tem linük nem bendanga agütsüogo aser nungshilongtem azüngtsüogo," ta pai ashi.

Nagarnar nung NMDC Steel Ltd indang Steel Plant yagi nisung meyirejang aika nem mapa inyaksü asoshi maongka agütsüba den iba dak sendaka aliba industry tem aika ajangzüksü.

PM Modi-isa, Antagarh aser Taroki na tsüngda rail line tasen ka aser Jagdalpur aser Dantewara na tsüngda rail line

doubling project ka nüburtem nem bendanga agütsüogo.

Pai, Boridand -Surajpur rail line doubling project aser Amrit Bharat Station Scheme kübok Jagdalpur Station yanglushitsü atema nungshilong azüngja liasü.

Ato Kilonser-isa, Taroki-Raipur DEMU Train Service tenzükja liasü.

Ketdangsurtemi ashiba agi, rail project tem ajanga Chhattisgarh kübok tribal tem aliba tesemtem tesendaktep tajungba akümtsü. Rail infrastructure yanglushiba aser train service tasen ajanga local nüburtem ajangzüksü aser iba tesem rongsenketzüng renloka aotsü asoshi teyari agütsütsü.

Parnoki ashiba agi, Ato Kilonser-i ano National Highway-43 kübok 'Kunkuri nungi Chhattisgarh - Jharkhand Border section' lenmang ajungkettsü asoshi bendanga agütsüogo. Lenmang tasenba yagi tesendaktep tajungba kümdakja nüburtem ajangzüksü.

Chhattisgarh nunga taküm küm tatemlen state pongu den külemi election agitsü. State nung Congress sorkar atsüngtoktsü atema BJP nükjiding lir.

Shivamogga mepetmesü nung densema alir 60 puogo

New Delhi, Mongputeni/October 3 (Agencies): Shivamogga yimti nung tamangba yimsü telok kati procession ka ayongzükba agiba mapang mangatettep adokba dak sendakba nung ken o 24 benokogo aser nisung 60 pua lir.

Shivamogga yimti kübok Ragi Gudda tesem nung Deobarnü long agi ontepba sülen tensa azüoka lir, ta police-i ashi.

"Ragi Gudda nung tatalokb dak sendakba nung onoki FIR 24 benokogo aser nisung 60 pua lir. Ragi Gudda nung tensa junga lir aser Shivamogga yimti nung tanga mepetmesü kecha madoki arudar," ta Shivamogga Superintendent of Police G K Mithun Kumar-i osangbenertem dang ashi.

Home Minister G Parameshwara-i Bengaluru nung ashiba agi, "tensa azüoka lir aser kecha shisabulutsü mali. Ken o bushisüngdang tenzükogo.. ADGP Law and Order iba tesemi yokogo aser iba yimti nung mungzükba inyaksangshiba sülen meyipa aruogo.. ken o bushisüngdang tembangba sülen parnoki kü nem osang agütsütsü."

School Education Minister Madhu Bangarappa shiba Shivamogga district Minister in-charge lir pai tanü Ragi

Gudda nung Deobarnü long agi ontepba mapang kongshiba ki kar semdangogo.

Bangarappa-i ashiba agi, procession mapang nok bener aliba koba video tem nung nguogo item noktem ya plastic mesüra cardboard agi yangluba liasü. Onok sobaliba nunga onoki trishula amer aser kasaji idakia iba yimya beshir anungji iba ya mashiyimi mangatetdaksüner. Nok ya azütokshitsü asoshi amshira police-i jenjang tapet agitsü."

Mithun Kumar-i ashiba agi, Shivamogga yimti nung shishilemba aser tanga inyakyimtem ajak akhi ama kecha tetsükdaksü makai odar. "Lendong atalokba sülena yimti nung 11:30 ako tashi Eid-Milad procession sunep sunepa agiogo. Shivamogga yimti kübok Ragi Gudda tesem nung dang lendong ataloka liasü. Ni iba tesem nung oa liasü aser onok police temi jenjang tapet agia ghonda tesadang ka tsüngda tensa azüoka liasü. Aibelenertem puogo," ta pai shisem.

Ragi Gudda nung tenokdangba kar agütsür lir saka tensa asadanga sülen item ya agintsü, ta SP-i ashiba den shisabulutsü kecha mali aser aibelenenem nem temernshi tesashi agütsütsü ta shisem.



New Delhi kübok Subhash Palace nung menoknok anokba tremors ajangshiba sülen kaketshirtem aser tesayurtem Institute kima adenshir aliba noksa nung angur.

INDIA bloc-i media anema inyaksangshiba aitsü

New Delhi, Mongputeni/October 3 (Agencies): Tawa Delhi Police-i, news portal NewsClick dak sendaka aliba osangbener aser mapa inyakerkem ki meita aoba ateshi media amakba dak sendakba nung Indian National Development Inclusive Alliance (INDIA)-i Mongolbarnü Bharatiya Janata Party (BJP)-i aniba central sorkar aitsüogo. NewsClick ya China den sendakpe lir ta shia meita oa liasü.

Tesem 30 meita aoba nung osangbener trok indang ki central Police special cell-i meita aoba densema lir. News portal yagi pro-China propaganda nungi senotsü teyari agizük ta aitsüba sülen Unlawful Activities (Prevention) Act,

1967 kübok ken o benokba dak ajemdaker meita aoba sentong tenzükba liasü.

INDIA-isa, sorkari capitalist tem nem media organization tem atsüngdaksütsü atema teyari agüja media ya par party aser tejangraba atema mouthpiece ka kümdaksütsü merangdangogo.

"Sorkar aser parnok den tebilemdangba putepa aliba lokti tentettemi ochi jembiba osangbenertem anema jenjang agir. Maneni BJP sorkari Information Technology Rules 2021 amala benoka osang tsüsang prokshitsü asoshi media inyaksangshi mesademi kümdaksüogo. Iba jenjang agiba ajanga BJP-i parnok temenen mimbangba dang masü saka India nung aliba

nüburtem nem shitaka osang agütsütsü nokdang. Iba ajanga ano democracy tejen ka ama India jenjang ajemdaksür," ta INDIA-i ashi.

Opposition party temisa, taoba küm teku tashi BJP sorkari investigative agency tem yoka media rishikangshiba aser parnok azüoktsü merangba indang bilemtetshia jembi. Parnokisa, British Broadcasting Corporation, NewsLaundry, Dainik Bhaskar, Bharat Samachar, the Kashmir Walla, the Wire aser NewsClick tetshia liasü.

"Onoki media aser temzüng ozüng agi tekümzükba agütsür aliba freedoms of speech and expression atema masetshi-i nokdaker," ta INDIA-isa shisem.

India-i Canada dang diplomatic staff 40 dak tema anintsü shiogo

New Delhi, Mongputeni/October 3 (Agencies): India-i Canada dang parnok indang diplomat 40 dak tema India nungi anintsü metetdaksüogo, ta Financial Times sangdong ka ajanga metetdaksü.

New Delhi-i diplomat tem anintsü asoshi October 10 nü latetsüogo, ta ken o jangja aliba source kati metetdaksü.

India nung Canada nunger diplomat 62 lir aser India-i taoba mapanga diplomat ya 41 kümdaksütsüla ta shiogo, ta osang kaket ajangsa metetdaksü.


Taoba mapang India-i Canada dang linük nung parnok indang diplomat tem ajemshitsü asoshi tetuyuba agütsüogo. Khalistani separatist ka Canada nung tepsetba dak sendakba nung Ottawa-i New Delhi dak tai tongloktsüba sülen India aser Canada na tesendaktep mejungi aküm.

External affairs ministry otongdar Arindam Bagchi-i ashiba agi, India nung Canada nunger diplomatic staff ya Canada nung India nunger staff dang nungi timba lir aser staff tem ya liromedema ayutsü

nüngdaker.

Sikh separatist lenir Hardeep Singh Nijjar, shiba India-i kiralongrar ka ama züngshir pa June ita Canada nung tepsetba dak sendakba nung India sorkari shilem agi asütsü ta Canada-i temulung meleme bilemba sülen linük ana tsüngda tesendaktep mejungi aküm.

Iba taitsüba ya India-i magizüki arudar. Taoba mapang Foreign Minister S Jaishankar-i ashiba agi Canada nung India nunger diplomat tem inyaksangshi mesademi kümogo.



Jantar Mantar, New Delhi nung West Bengal sorkar nem MGNREGA scheme fund magütsüba anema TMC züngsemtemi longkak aitba noksa nung angur.



TIR YIMYIM YIMOBILEM (EDITORIAL)

DIMAPUR RASEMNÜ, MONGPUTENI (OCTOBER) 04, 2023

Alu yimer meyima lir

Asenok ya tang inyakba mapatem nungbo mezüing pur, first generation, asütsüa akok saka aluyimba mapatem nungbo tejenpur kintem rongnung ka asütsü, kechiyong asenoki bilemetetba aser jembiba otsüla oboula nunger putu mapang parnoki inyakba mapa ajunga agi aluyimba dang liasü. Ibayongji, asenok tar nunger otsü, akhi benjongbentsü amungba, külemküja mapa aser sentongtem aser anogo shia amshiba osettem ajak aluyimba maparen dak sendaka lir. Aji oda, jungjunga bilemdangra, tanü putu nung lanurtemi dang masü saka taintemi dena asenok sobaliba aser oshiooben sentokba aser sobaliba benjongbentsü sapua mamongba ya asenok Khristan akümba agi masü mesüra kaketshisatsü nung temetetba akümba agia masü saka asenoki aluyimba mapatem toktsüba ajanga lir ta angatetter. Ano, aluyimba mapa toktsüba ajanga asenok akoksaba mapa tongtibang kaji anogo shia ita anü takzüa alu mapa inyakba indang amadokba ya asütsü. Aluyimba mapa nung ya ita anü aser tsüngsang mopong indang shisadangba aser takzüka (astronomy & weather forecast) mapatem dena lir. Iba jagiang, asen tsüraburtemi alu achiba nungi aluruba mapang tashi ita lanu aser tashi indang takzüka alu inyaker aser tsüngsang ajungtsü majungtsü indang takzüka alui aoe. Tanübo asenok tashitemeteteremi dena koba anogo nung mi tesashiba jangrutsüla, koba anogo nung tsük metsü yoktsüla aser koba anogotem nungang kisüjensütsü atema tongshi tongnü alentsüla memetet kümogo. Aji oda, anüing tereprangtsü koma asüdang anü apur aser tsünglu arur mesüra yipru aiter, itemji asenoki tanübo office mesüra dokan nung mena yur metakzüktetter. Atangji, tangar tashitemeteteremi bushiteta anogo shia tsüngsang mopong indang jelia metetdaksüba indangbo asenoki meteta lir aser itemji repranga asenok anidaker. Ajisüaka, itemji tangari metetba aser bushitetba nung asenok ayongayonga anidaker dang ashi, asenoki itemji kodaser komaka takzüar memetet. Ajisüaka, asen tsürabur putu nung aluyimba mapangbo item ajakji parnokksasa takzükteta liasü. Itemji dang masü saka ano aluyimba nung asenok peisasa pei jakla yimya aser shi azü azüoka alitsüba indanga densema liasü. Aji oda, alu mejungali ta mesüra azüyalir ta alu mapa tenzükdang apuania dena shi nung memedem meshiteta aser anempunga amung. Aji oda, tanübo item kaket nung manguba shisatsü aser peisasa pei taküm azüoka alitsüba inyakyimtem indang tesayuba ajak samadoker, asenok mashimashika tangar jiluang ajizüka libaliruba angur. Iba jagi asenok tangar sobaliba aser tashitemetet agi amokbangdaksür asenoki asenok kin aser yim den amadoker liteper. Ashiko, tanübo asenok tebok sünga aliba agi, kiojen tajung nung aliba agi mesüra senotsü akaba agi asenok shisamebului liteper asütsüa akok, saka asüing tangalen nungi jangotsü yokba ya anenadok nungbo mesüra aonsutsü aser süngjanglijang ya tangalen nungi maruka aküm nungbo koda sütsü (?) ta bilemdanga, tanga mapa nung tajangzük tulu ngua inyaka liaka, aluyimba dangi meyip nung dang asenok mapang tamajung nunga jenoktettsüsa temulung lemdak akatsü. Asenokbo tia ajung, asen lima nungbo asenoki kechi lu yimdir yimaka ajungtsüsa ali aser tzu mopong tajung moaja lir. Atangji, ajaki alu tapu ka ayimtsübaji menüngdaker, ajisüaka asen ali aser tzu mopong dak apet kari tsük lu, kari jenjang menjang lu, kari azüngken lu, kari manü aser ponglashi lu, kari aonsutsü lu, ano karibo naro lu, süngjanglijang lu ta asenoki dang aluyimba dangi meyipdi asünungbo alu yimer meyima tapu aika yimteteta lir. Item ama lutemji kodang asenoki ayimtsü tenzükdir, asenoki anü apuba, tzunglu aruba aser yipru mopong aonba indang tali metettsü aser ita anü aser petinutem arakzüka indang aika angazüktsü. Idangji dang asen lima nung anüing ozütem adenshitsü aser arem shiruru aser ayong nung aliba taküm sangnutem züintsü. Aji oda, kodang asenok ajaki aluyimdir asenok asoshi mapai aoba aser benjong amungba mapang aser anogotem ka dang akümstü aser Tsüngrem tashi aser temoatsüa asen taküm aser kibong nung tali jangjatsü.

OLEMSABANG

TEZÜLEN NUNGI MASÜ SHIDAKBALENI MAPA ANGUTSÜ MERANGTSÜLA

- L.Kika Pongener.

Küm aika kaketshirtem aser mulongtet telok (NGO) ajaki sorkar dang takhangba agüja aruba sorkar-i agizüka, Nagaland Staff Selection Board (NSSB) Exam. asangsang nung takok ngua agir, tawa takok angurtem nem Chief Minister-bai 'Appointment Order' lema agütsüba osangkaket nung ngur, nubur ajungai kanga pela-a bilemogo. Asen Naga nungera joko tangar ama alima tejakleni aoba den jangyumedema aotsü mera agidar...ta nubur ajaki kanga numadanga bilemer. Aji oda, iba ya asen Naga nunger asoshia takok tuluka anguba mapa rongnung ka asütsü. Ajisuaka, ano NSF-i anir kaketshirtem aser mulongtet telok ajaki meteta alitsüba kanga tongtipang kaji, NPSC & NSSB Exam anaprongla ya tenüing agi Exam-bo agir, saka telunglen sen tashi (Money-Power) agi inyakyim kecha nunga nuburi tamang makatsüsa meinyaktsü atema, kanga tenük yoka reprangtsüla. Aji oda, mapa ajakji nisungi dang inyaker, nisungi dang ketdang asür, Computer-jia nisung temeyong agi dang anemer...Aser nisungi inyakdi sura tamakoktsü mapa kecha mali. Aji oda, alima nung sen tashi (Money-Power) agi makoktsüba mapa kecha maka, anungji takok nguogo ta ser zübazüba-a meli-i, mapang shia chirapera-a tenük yoka reprangtsüla. Joko tang nungibo, Minister/MLA/Public Leader/Officer-a suang...Kari danga, Exam. majangi tezülen (Back-Door) nungi, 'Appointment' agütsüba putetra, yimjak nung tutettsüla aser tapet temerenshi agütsütsüla.

Anungji jokorla tang nungibo asen Naga lima nunga, tezülen (Backdoor) nungi sorkar mapa angutsüba lenmang mali kümadokogo... ta meteta yudi. Mapa tulutem 'Gazetted Post' (Grade-A) aser iba den tatongdak (Grade-B) Post-tem ajunga Nagaland Public Service Commission (NPSC) Exam. ajanga agir, aser 'Third Grade' (Grade-C) post ajunga Nagaland Staff Selection Board (NSSB) Exam. ajanga agitsü. Jokorla, 'Fourth Grade' (Grade-D) Post Peon, Chowkidar aser Sweeper, yamala kar dak alaka, tezülen (Backdoor) nungi Exam. magi-i Sorkar mapa angutsüba lenmang saksaka kümadokogo. Ajisuaka, asenoki khen jungjunga shisadangra, lenmang saksaka akümbaji tilar/sensaker atemabo, sorkar mapa angutsüba lenmang tasen ka lapoker asütsü, mesura maangka tajung ka angur ama bilemstüla. Aji oda, taoba/tesuiba küm tashibo, lanur aser kaketshir ka kechi-koma'ar ka techira/takotet asüyongjia, teka nung sen/rongsen makara, sorkar mapa angutsü tasaka ta bangpetsü amai jembia aruogo. Ajisuaka, joko tangpo tular-tilar aser takar-sensaker chirnurtem ajunga külemi jenjang küsa dang kümadokogo. Kechiyong Minister & MLA, aser sorkar mapa nung tazüngbur, tular kimang-sosem aliyongjia, aser teka nung senotsü/rongsen aika akayongjia, Exam. majangibo mapa angutsüba lenmang shibangadokogo.

Anungji kaketshirtem aser lanurtem...Ner kimang-sosem Minister/MLA lir-ji ta...mesura sorkar mapa nung tazüngbur tular lir-ji...ta temulong lema meli-i, akokba tashi meranga zünger Competative Exam. ajanga takok ngur mapa angutsü merangtsüla. Kechiyong joko tang nungibo, shinga-ia tezülen nungi (Backdoor) mapa agütsütsüba tamakoktsü kümadokogo, oda 'Third-Grade' (Grade-C) mapa tashi Competative Exam. ajanga mesura mangutsü...ta angateta yudi. Ashiko, Minister/MLA-tema tang nungibo Election Canvassing nung Vote bushitsü atema, sorkar mapa agütsütsü ta nuburtem mesuzüktsüba lenmang mesumesua kümadokogo. Aji oda, parnok-ia ariana, Peon, Chowkidar aser Sweeper Post amala kar dang 'Appoint' sutettsü tashi (Power) alitsü sudi....Ashiko, iba dakji temabo tashi mamshitettsü sudi. Anungji lanurtem aser kaketshirtemi angatettsübaji...Kechi komar'ka mapa tulu asüyongjia, tezülen (Backdoor) nungi angubaji akümket ka mali, saka Competative Exam. ajanga angubajibo mapa tila ka dang suaka khenyongi akümket balaka lir, aser kenubosa tular menden nung amentsü. Anungji, lanurtem aser kaketshirtem...Na koba Degree azünger, na koba 'Field' azünger, iba nungji temulong kanga agüja züngang...aser chichiba/shidakba Degree ngua zünger Competative Exam. agütsür, takok ngur mapa angutsü merangtsüla, aser ano akokertem-ibo na kechi azüing iba lenmang (Field) nungji ne sasa ne nija mapa kar tenzüker, na kibur ka kümer alitsüla. Ajioda, nai tangar nema mapa karbo agütsütsüsa, na kibur ka asütsü merangtsüla. Anungji shinga daka memetaloki pei sasa meranga inyaka pei kibur küma, tangar-a yaritettsüsa inyaktettsü merangtsüla...Aji oda, nisungi inyakyakdi ta sura ajakji takoktsü...Anungji inyakteterbo ajisa ajak tang tajungtiba asütsü.

Asenoki asen Naga lima nung mapa maka ta jembir, saka mapa maka masü asenoki azümesenba agi meinyakerba dang, kechiba sura, asen lima nung mapa inyakera meinyakmai nangdaka dang lir. Tazünger inyaktettsüba mapa-a lir aser mazünger inyaktettsüba mapa-a lir, saka asen Naga nungeri 'White Colour Job' dang bushir, asentsü sena meranga inyaker chiyunga-jema litettsüba mapa asen lima nung aika dang akayongjia, asen Naga nungeri item mapaji meinyaknur. Tangar tzüma-longmartembo Assam-India lima nungi asen lima nung arua meranga inyaker, takar kümer par lima nung oa lakh-Patti/Crore-Patti kümer jangratema alir. Angazükba agi asen lima nung Rickshaw-Walla & Dilla-Walla-tem ya par lima nungbo, ki tulu-lu atongtepa yanglua yur, Tzü-lu tulu-lu alidena yur takar danga ta jembir, aser aji tiyazü masü shitak asütsü. Dokan shishirtem ya balaka takar-tetsüdi 'Crore-Patti' danga ta jembir, aser aji tiyazü masü shitak asütsü...ta bilemer. Tzümartembo par lima nung mapa makaba agi asen limai arur, meranga inyaka takar akümer, saka asen liso nisungtembo pei lima nung Tzümartem chuba kümdaksür...aser parnok dang aputaka külema parnok kilir kümer alir.

Anungji lanurtem aser kaketshirtem...Tanü putu ya tajunger rongnunga tajungertemi tang takok angutsüba aser sorkar/company mapa-a angutsüba putu ka kümadokogo. Aser joko teka nung sen lir ta ser mapa alizüktsüba putu-to masü, Competative Exam. ajanga dang mapa-a angutsüba mapang kati menepogo. Anungji nenok kechi Degree azünger, iba Degree nungji chichiba/shidakba mongin küma zünger, Competative Exam. agütsütsüla, aser tezülen (Backdoor) nungi masü, saka shidakbalen nungi mapa angutsü merangtsüla, mesura pei azüngba 'Field' nungji, pei nija mapa kar tenzüker na ne sasa kibur küma alitsü merangang... ta lanurtem ajak ajongshir.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Azerbaijan-Armenia rara ajanga tamanger aika lendong nung lir

Mongputeni/Oct. 03 (Agencies): Azerbaijan aser Armenia tsungta raraba ajanga lenmang balala nokdanga Khristanpur meyirijang aika lendong nung lir, shirnok linük ana tsungta mangatetep aliba tesem nungi mainshiteti lir, ta tamangba yimsü tsütsü mongin temi ashir.

Iba linük ana tsungta raraba ya küm aika tejkadang tenzük saka tang tesüsa raraba ya September ita nungi tenzük Muslim nung timba aliba linük, Azerbaijan-i anüolen kidanger linük Armenia amakba ajanga lir. Armenia nungya Khristanpur timba alir. Armenia Khristanpur 120,000 shi mangatetep aliba tesem koba dang Nagorno-Karabakh ta ajar, yangji alir, koba Azerbaijan anüolen lir.

Lachin Corrido ta ajaba alika agi Nagorno-Karabakh ta Armenia den sendakteper. Region ana tsungta lenmang yangji dang lir.

Azerbaijan-i December ita iba corridor ya shibangaka

Open Doors ajanga alima nung Khristanpur alitsü asoshi linük tamajungtiba tem asadanga World Watch List nung Azerbaijan ya jenjang 58 buba nung lir. Tamangba yimsü tsütsü oshioben ajak sorkari achayanger aser tamangba yimsü dak sendakba mapa inyaksü temelaba nungdaker, ta Open Doors ajanga ashi.

Iba region nung aliba pastor temi Khristanpur dang sarasademtsü ajungshir.

"Asenoki yimjung asoshi sarasademtsüla, aji asünung dang Tsüngremi rara ya anentsütsü. Tesem ajaklen sepaitem asüba ali, aser kinungera süogo. Tang civilian tem iba tesem yutsür aor," ta pastor kati Open Doors dang ashi.

"Iba rara jung-junga angatettepsü, azüdoksji ojang alitsü asoshi sarasademtsü kanga tongtipang. Asü-amar aika lir, item kibongtem nung Tsüngremi anisüngzük agüjang ta sarasademjang," ta ano pastor kati ashi.

"Iba region nung asen Tsüngremi Pa chirtem kumzuka ayutsü aser parnok yimjung nung alitsü atema sarasademti. Parnok azüdokshi agi ojang tim atemtsü sarasademti."

Pakistan nung pastor kati tiazü kuli agütsü, mangatetep adoka lir

Lahore, Mongputeni/Oct. 03 (Agencies): Pakistan nung Islamic extremist temi prangbong agi yirutsü ta tai tonglokja aliba ya pa sasa yiruba lir ta pastor kati nangzükba sülen police temi Hokulbarnü (September 29) pa anema ken o ka benok, ta osang ajanga ashir.

Faisalabad district kübok Kukranwala yimtsung nung aliba Presbyterian church ka nung pastor, Rev. Eleazar Sidhu-i police nem ken o ka agütsüba nung September 3 nü Muslim yimsü akhanga amanger temi pa dang 'Islamic creed' azungtsü ashi aser pai memolungba mechi prangbong agi akha, ta shia liasü.

Ajisüaka September 14 nü Board of the Presbyterian Church of Pakistan tenung nung Rev. Altaf Khan-i Pastor Sidhu mapa nungi anentsütsü züluba shiti social media nung temai adok, kong pa sasa yiru ta külem tenzük aser tembartem dang pa sasa nangzükba ajanga September 13 nü Kukranwala nung aliba Presbyterian Myong-Sang Nasreth Church nungi pa anentsütsü ta shia liasü.

Pastor Sidhu-i item inyakyim ajunga ya tetsübo mesüra temerenshi kecha makai yangluba nangzük, saka ken o metembangin alinung arogoi tatem kuma mera maginer, aser iba ken o tatem kati maru tashi pa indang employment contract aser pa den tesendaktep ajak tempanga atar, ta Pastor Khan-i ashi.

Iba sülen September 15 nü ano social media nung video ka

prokshiba nung Pastor Sidhu-i police ketdangsur ka matsüngdang pai tiazü jembiba nangzuka liasü.

"Ni tebilemstü khuret aliba ajanga iba ya inyak. Ni police tanüker aginü. Ni pistol ya alu nung tzü aoba lenmang (canal) nung indok," ta pai video nung ashi.

Iba mapang police tanishiri, "Pastor na adianu ka lir. Nai ashishitepa ken o benokdang onok aru. Na nasasa yiru ta doctor-i shiogo," ta ashi.

Police temi iba ya nangzükdaktüsü asoshi pa merenshi ta Pastor Sidhu-i, ta Karachi nung aliba human rights activist Ghazala Shafique-i ashi saka Faisalabad police-i yamaji meinyak ta shiogo.

"Sidhu temang tendangba nung pa teka nung injang agi makhadang anesthesia inoker liasü ta sayu," ta police osang ka ajanga ashi.

"Injang ya pa indang tapobang nung inch asem dang yir liasü aser gunpowder ajanga arongba tarak liasü, anungji prangbong ya meta talang nungi masü saka teret meraksatsüsa anasa nungi khaloktsüba ama ajitet."

Injang agi yiruba aser pa dak dangari akha ta pastor-i ashiba meputeper, ta police-i ashi.

Bushisüngdangba mapang pastor-i o melenshia ashi, saka medical report bener pa den asüngdangya dang pai pa sasa iba mapa inyak ta nangzük, ta osang ajanga ashi.

Gulfam ta sür Khristan kati pa dak anesthesia ajem agitsü aser pa den yariteper Johnson



Faisalabad, Pakistan nung okadak ken o mejembidang tangokba noksa ka nung Rev. Eleazar Sidhu angur.

Masih-i injang khaloktsütsüsa pa teka nung soit ta pai onok dang ashi.

Pastor Sidhu dang ozüng alema .30 caliber pistol ayoksang Muslim nung ka puogo, ta police-i ashi.

"Onoki tang tashi iba pistol ya mongutet, kechiaser Sidhu-i tzü mesür aodak indok ta ashir," ta pai ashi.

Karachi, Sindh Province nungi nisung ana densema Khristanpur temeden asoshi nokdakertem Jaranwala nung par kidang nungi Pastor Sidhu anizüker aotsü merangdang pa anema ken o mebenok aser police tem tanüker yoker liasü, ta police ketdangsur i ashi.

"Sidhu'er ki anüksü yokba police den yangji aliba tetsürtemi tim masüba mapa inyaka pa anizüker aotsü merangba nokdang. Iba mapang activist temi video tangoka police temi Sidhu ya merenshi ama kumdaktüsü.

ANO GO ABEN TSÜNGREM DEN

Otsü tabensa ka

T. Ken 136:10-26

Asenok akaba otsü rongnung Israel otsüji dang tabensa otsü lir. Ibai koda tenzük, koda ain, tanü ibai lir aser iba tanüngba otsü kong alitsü- Tsüngrem o dang pelaang.

T.ken 136 nung ken züluri Israel otsü meyipa ajir. Pai reprangdang, pai Tsüngrem taochi angu. Pai Israel asoshi tesüngmangtsü mapatem asem inyak: Pai parnok anitet; Pai parnok ani; Pai parnok anir ait. Tanü Tsüngremi asenok kasa yimya nung anepalur.

Tsüngremi Israel nung Ejip alar talenba nungi anitet (t.10-12). Ibaji alangzükba. Idangji Pai parnok Temerem Tzüyim aser arem ajanga anir aru. Tatem nung Pai parnok tenangzükba limai anir aru. Mamangbayong tejen putu pur asü, saka putu tasen pur sentsüwangshi aser ain tulu nung ait aser parnok senmang akang.

Tsüngremi tanü ibaji asenok asoshi inyaknü. Pai asenok temenen lar nungi nüji süa lidaktsüner. Pai asenok taküm tzü tarok aser arem nungi anitet, Pai asenok asoshi yuja aliba senmang agidaktsüner. Tsüngrem den asenok otsü terenem.

Tanü nai tia kar tamakoktsü ama ajuruya alitsü akok. Tsüngremi lenmang lapoktsütsü ta amangang. Pai na ne timtem nungi anitetjang aser ne senmang dangi anir arudakjang.

Onoki tena mapang tatsüka pua ayu aser ken o mebenoki chiok."

Sidhu-i ashiba nung activist Shafique-i amang, kechiaser pai Laishiba nung nemeter pai ochi jembir ta shia liasü, ta Shafique-i ashi.

"Par kinunger temi pa yaritsü kü den jembir, kechiaser police temi tashiyim amshia Sidhu nem nangzükdaktüsü ta parnoki amang. Onoki pa ajurudang pa kanga timtema aliba ama angu. Aser pa tai mali ta ashi aser onoki amang," ta lai Morning Star News dang ashi.

Onoki medical report mesüra police temi bushisüngdangba nung mamanger. Pastor Sidhu-i onok dang iba ken o nangzüktsü asoshi tashiyim amshi ta ashi, aser iba yongji onoki police anema ola adok.

Pastor Sidhu-i First Information Report (FIR) nung temolung melemettsüsa ashiba aser iba tatalokba indang balala ashiba indang la dang asüngdang dang la tera mangmanger ama liasü.

Pastor Sidhu-i benokba FIR nung metokmeperi jenti lir, ta attorney Lazar Allah Rakha-i ashi.

"Par tekülem ki jara nung Islamist yimyim züluba nungi tenzük mejangjaba nisung temi amokmerenba aser tepsettsü merangba indang pai ashiba ya kata shidak masü," ta pai ashi.

Nia Khristan ka asünung, pastor dak injang khaloktsüba osang angashia ni süngmang, ta Rakha-i ashi.

"Ajisüaka Pastor Sidhu-i

FIR nung zülua aliba zünger ni tim masüba ajitet. Tatishitsü agi, putir aika liaka kechiba Islamist temi par tekülem ki jara nung dang yamai zülusa ta tasüngdangba ka aru," ta Rakha-i ashi.

Iba tesem nung arogo 27 lir aser August 16 nü Jaranwala nung Khristanpur dak timtem agütsüba asoshi obendang khanga ola adokdang Pastor Sidhu densema pastor shinga maden, anungji kodaser pa dak dang tenük yoktsü, ta pai ashi.

"Ajidang masü, kodaser lendong agütsü temi Pastor Sidhu ya yangji tzü indoktsü ta meteta ata liasü? Pa tamangba yimsü melentsü asüngdang injang khaloktsü ta pai ashiba ya amangla masü. Nisung tepsetba densema ni ken o tamajung noklang aika angadanga jembio, anungji Sidhu-i iba tasa ya yanglu ta ni amanger."

Honibarnü (September 30) Faisalabad nung aliba judicial magistrate Nausheen Umair-i Pakistan nung sen 100,000 (US\$347) alang surety bond nung Pastor Sidhu ya bail agütsü, ajisüaka Maintenance of Public Order indang Section 16 kübok pa Faisalabad jail nung October 14 tashi alitsü. Tiazü nung tai tongloktsüba ken o nung aitsüra tepuokdak küm tenet tashi ayur aser senchi achir.

Open Doors ajanga alima nung Khristanpur alitsü asoshi linük tamajungtiba asadanga 2023 World Watch List nung Pakistan ya jenjang tenet buba nung lir, koba taoba küm jenjang ti buba nung liasü.

AO OSHI ANGAZÜKDAK:
TANÜ ANGAZÜKTSÜBA OJANG



Sangma

(v) telong ka agi ana kümdaktsü (break into two)
* Oyalai amtsük ka sangma aser kenu küna nem kaka agütsü.

Sangmongpi

(n) arasentsür, arasener, tia ashir (fortune teller)
* Sangmongpi dang shiranger tia indang asüngdang.

OLONG PAITEP # 6656

1		2		3		4		5
			6		7			
8								
					9			
		10						
11								12
				13		14		
15								
16						17		

TIPIEN

- 1. Nüji masü - (4)
- 3. Techinütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

LANGTSÜNGLEN

- 1. Jila tulu - (5)
- 2. Sarasadem dang tembang - (4)
- 4. Tarutsü indang ashirtem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

OLONG PAITEP # 6655 TELANGZÜBA

TIPIEN :

- 1. Tesangra, 5. Mungo,
- 7. Kisen, 8. Salem, 12. Semki,
- 14. Kilem, 15. Kensü,
- 16. Sangpang.

LANGTSÜNGLEN :

- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.

Agüja aliba noksa nung meputepi aliba bushiang



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



1. Tenüng :

2. Tasoba anogo:

3. Küm : 4. Class :

5. School :

6. Talidak :

7. Salem osang :

Assam police ketdangsür kati süpokrem agidang apu



Guwahati, October 3, 2023
(Agencies): Assam nung Directorate of Vigilance and Anti-Corruption (DirVAC) Hailakandi district kübok

Assistant Sub-Inspector kati süpokrem agiba atema apu. Police ketdangsür ya Abdullapur Police Patrol Post nung Hitush Nath ta jangjaogo. DirVAC ketdangsürtemi Dutta aputsü atema tasa ka atong aser pai Rs 10,000 meshia agidang apu. "Abdullapur Police Patrol Post, Dist. Hailakandi nung ASI Hitush Nath-i Rs.10000 süpokrem meshiba atema apu. Telok ana tsüngda ken o angatetteptsü atema pai süpokrem meshi" ta Directorate of Vigilance & Anti-Corruption, Assam ajanga metetdaksü.

Manipur nung ola madoki lungkak aitba sentong ka agi

Imphal, October 3, 2023
(Agencies): Mongulbarnü lanurtem teimba ser nisungtemi curfew alema ola madoki lungkak aitba sentong ka agiogo.

lisopurtem dak azütokshi mapa inyakba anentsü atema takhangba agütsü. Parnokisa Manipur nung NRC mapa tenzüktsü, pei talidak toktsür aoertem pei pei kidangi aotsü, ketdangsübaren balaka magütsütsü aser tetsürtem o tanurtem dak tashiyim mapa inyakba anentsü takhangba agütsü. May 3, 2023 nungi Meitei aser Kuki nung tsüngda rara tenzükba sülen nisung 175 tema

süogo, ta lungkak aitba sentong lennir Sana Mangang-i osangbener dang ashi. Laisa telok balala dang ozüng alema inyakba anentsü aser tarutsü putu atema yimjung yanglutsü tayongzükba agütsü. Tensa mejungi akümba ajanga state sorkari Imphal East district kübok Khurai tesem nung mapang telatet makai curfew alitsü ozüng agüja liasü.

Tripura nung BSF-i tai maketba nisung ka aibelena khaset

Agartala, October 3, 2023
(Agencies): Tripura kübok Sepahijala district nung Border Security Force (BSF) sepaitemi nisung ka aibelena khaset. Iba nisung ya Alamgir Hossain liasü ta jangjaogo aser Sepahijala district kübok Durgapur yimtsüng nung iba lendong atalok.

BSF-i nashi shibelener nisung kar arshia aodang Hossain dak aibelena injang khaloktsü. Iba sülen pa Sonamura Social Health Centre-i anir ao saka süadok. "BSF-i nashi shibelener arshia aru aser parnok ozü kidangi arua jenok. Idangji kübo kima nung noktaka liasü aser

BSF sepaitemi pa dak injang khaloktsü" ta Hossain'er jabaso Mohammad Ali-i ashi. Hossain'er kibongi iba tatalokba bushisüngdangtsü aser aibelena BSF sepa merenshitsü atema takhangba agütsüogo. Iba osang zülü tashi nung BSF nungi sangdong kecha mali.

Special Operations Group ajanga prangpong-injang angu



Imphal, October 3, 2023
(Agencies): Osang tejangja ka nung ajemdaker Assam Rifles aser Special Operations Group (SOG), Manipur Police ajanga Thoubal district kübok Salam Patong yimtsüng mita ao. Idangji parnoki prangpong 4 (7.62mm SLR, Carbine & improvised mortars) aser

injangtem ngutet. Parnoki ngutetba prangpong-injangji Nongpok Seikmai Police Station ket nung agütsüogo. Assam Rifles and Special Operations Group (SOG), Manipur Police-isa Imphal-West, Thoubal, Bishnupur aser Churachandpur district tem nung mita ao.

NH-37 Imphal-Silchar nung gari 401 aser NH-2 Imphal-Dimapur nung gari 197 tashi parnoki meina aruogo. Manipur kübok hill aser valley district tem nung Nakas/ Checkpoints 131 tashi lapoka lir aser police-i tesem balala nung ozüng alema inyaker nisung 1724 puogo.

GOVERNMENT OF NAGALAND
STATE COUNCIL OF EDUCATIONAL RESEARCH AND TRAINING,
NAGALAND, KOHIMA.

NO.SCERT/TET/GC-2/2022/

Dated Kohima, the 3rd Oct. 2023.

NOTIFICATION

This is to inform all the concerned candidates who have applied for Nagaland-Teacher Eligibility Test - 2023 (N-TET), that the Admit card for the examination is uploaded in the SCERT website - scert.nagaland.gov.in

The candidates may download the Admit Card for N-TET 2023 and appear the examination on 07th Oct.2023 at Kohima.

KEVIRALE-Ü KERHUO
Director,
SCERT, Nagaland, Kohima.

"The harvest is plentiful, but the workers are few. Luke 10:2



INSTITUTE OF INTER-CULTURAL STUDIES

OUR VISION

We are committed to reaching the unreached people groups of South Asia with the message of the Gospel of Jesus Christ.

The mission is right at our doorstep!! It is time to realign our vision and mission to reach those who are within our reach.

This program is not only for cross cultural missions but is also applicable for local church leaders, laypeople and anyone who is passionate about evangelism and soul winning. A renewal of vision for missions.

PROGRAM HIGHLIGHTS

- Cross Cultural Mission Oriented
- Learning from Experts
- Interactive Class Room Training
- Relevant for Homeland Mission
- Field Exposures, Spiritual Renewal,
- Affordable Fee

DURATION
5 Months

28th OCTOBER, 2023
TO
18th APRIL, 2024

5 Months Cross Cultural Training Program

3RD IICS BATCH 2023
Admission Open

FOR CONTACT
+91 96150 86185, +91 90898 68226
Artang Ward, Mokokchung, Nagaland -798 601.
iicsmokokchung@gmail.com www.iicsmokokchung.com

DR Congo mitkar tanishir ka nem tasüba temerenshi agütsür

Kinshasa, Mongputeni/Oct. 03 (Agencies):

Democratic Republic of Congo nung August ita longkak aiter nisung 50 dak tema tepsetba nung shilem agiba asoshi army colonel ka nem tasüba temerenshi agütsü.

Goma yimti nung elite Republican Guard indang ex-commander Col Mike Mikombe-i UN anema longkak aiter dak injang khaloktsütsü totuyuba agütsü ta aija liasü.

Military court ajanga obendang agütsüba anema temepishiba ken o benoktsü, ta pa indang okatsür temi ashir.

DR Congo anüdoklen UN peacekeepers anema longkak aiterem dak tashiyim amshiba mapang nisung timtiba asüba ibaji iba ya liasü.

Longkak aiter temi UN sepaitem par linük nungi anizüker aotsü khanga liasü, aser küm aika telungpur telok balalai lendong agütsüba nungi parnok i nüburttem mekumzükter ta aitsü.

Iba linük nung UN personnel 18,000 jungnüa lir, aser yangji sepai 12,000 dak tema lir, anungji alima nung UN mission tulutiba jenjang tanabuba alitsü.

August ita longkak aitba ya iba region nungi UN sepaitem anizüker aotsü takhangba agüja Wazalendo (Patriots) ta ajaba Christian sect kati ayongzüka liasü.

Longkak aiter temi Governor Ndimba Kongba mapang nungi anendaktsünü, shibai taoba mapang longkak aiter nokdang. Iba sülen governor ya melenogo.

State prosecutor ajanga ashiba agi, August ita iba longkak aitba mapang civilian 56 tepset aser ano aika yirua linük balalai aitsü.

Iba mapang security forces temi nisung 150 dak tema pua liasü. Nisung nungzütepba mapang longkak aiter dak Col Mikombe totuyuba nung injang khaloktsüba indang court nung jembia liasü.

Iba tekoka ya M23 telungpur telok ta meshidak angateta totuyuba ya agütsü, ta pai ashi. M23 telok yagi taoba küm North Kivu province nung alinük tuluka rakzüka lir.

DR Congo nung tasüba temerenshi agütsütsü obendang ya aiben agütsür saka küm 20 dak tema nung iba mapa inyakba mali. Iba temerenshi ya takum tepiyong tepuokdak alitsü agi melentsür.

Col Mikombe den ano sepai pongu anema ken o ya benoka liasü. Par asem küm ter tepuokdak ayutsü obendang agütsü aser Col Mikombe indang deputy densema nisung ana nem temeden agütsü.

July 2022 nung UN anema longkak aitdang peacekeeper asem densema nisung 15 dak tema süa liasü.

DR Congo indang Tir Félix Tshisekedi, shiba December ita ano tir election nung tokteptsü lir, pai UN sepaitem dang taküm sa linük yutsür aotsü ayongzükogo.

Ankara amakba sülen Turkey-i nisung 928 sota lir

Ankara, Mongputeni/October 3 (Agencies): Pei temang nung bomb alenoker pokdaksürtemi Turkey yimtiba Ankara amakba sülen anogo ana lir Turkey nung police temi Kurdish telok den sendaktepa lir asütsü ta temulung melemi bilema alir nisung 928 sota yuogo.

Interior Minister Ali Yerlikaya-i, Mongolbarnü ashiba agi, police temi Turkey kübok province 64 nung tesem balala meita ao aser ozüng alema inyaksangshiba Kurdistan Workers' Party (PKK) nung densema alir asütsü ta temulung melemi bilemertem sota liasü.

Iba meita aoba sentong nung security personal 13,400 shi-i shilem agia liasü, ta minister-i social media platform X ajanga metetdaksü.

Minister-isa, ozüng alema beshiba prangbong hadir balala 1000 dak tema puogo, ta metetdaksü.

Al Jazeera indang osangbener Sinem Koseoglu-i ashiba agi, meita aoba mapang temulung melemi bilemertem takokba tashi sota ayutsü atema security force tem nükjindong liasü.

"Iba tetezü parnok i sota yua alirtem ajak ya aputsü ta mali. Iba ya ken o jangjatsü atema khen asoshi sota ayuba dang lir," ta lai Istanbul nungi osang agütsüba mapang ashi.

Koseoglu-i ashiba agi, meita aoba sentong ayongzüka agiba ajanga police temi PKK züngsem asütsü ta temulung melemi bilemertem indang osang taoba mapang dang nungi tang timba bendena aliba sayur.

Laisa, Mongolbarnü tesem balala meita aoba rongnung teyongtsü ji Sanliurfa yimti

liasü, koba Syria den arrtsü nung lir aser southeastern len yimti tulu ka lir.

PKK pur yagi küm aika Turkey den rara arudar aser parnok ya United States aser European Union-i kiralongrar telok ka ta agizüka lir.

1984 küm mangatettep tenzüka sülen nisung meyrejang aika taküm samaogo.

Deobarnü pei temang nung bomb alenoker pokdaksür kati Turkish Ministry of Interior kikümtong anasa bomb pokdakja liasü.

Summer recess sülen parliament tenzüksheba mapang tir Recep Tayyip Erdogan-i parliament nung o jembitsü ghonda ishika lia iba lendong ya ataloka liasü.

Kasa mapang nung bomb pokdaksüsang nem teyari agütsür ka police den khatepba mapang tepseta liasü.

Iba lendong nung police ketdangsür ana terara yirua liasü, ajisiüka nisung takümbo ka danga mesama.

Iba tesem amakertem ya gari ka nung mener iba tesemi aru. Iba gari ya Kayseri yimti nung veterinarian ka indang gari liasü, koba tenati veterinarian sang ya tepsetba sülen auyaba liasü, ta ketdangsürtemi metetdaksü.

PKK-i iba tesem amak indang nangzükogo aser Turkey nung ketdangsürtemi Turkish Ministry of Interior amaker ana rongnung kabo PKK züngsem ta jangaogo.

Iba tesem amakba sülen ghonda ishika lir Turkey nung tayimtsü temi northern Iraq nung PKK pur jenoka aliba tesem asütsü ta temulung melemi bilemba tesemtem maka liasü.

Nisung asem nem 2023 Nobel Prize in Physics agütsür

Stockholm, Mongputeni/Oct. 03 (Agencies): Electro dynamics in matter bushitsü asoshi 'attosecond pulses of light' adokdaksüba experimental methods asoshi Pierre Agostini, Ferenc Krausz aser Anne L'Huillier nung nem 2023 Nobel Proze in Physics agütsür, ta Royal Swedish Academy of Sciences ajanga Mongolbarnü sangdong.

Swedish scientist Hans Ellegren-i par asem tenük ya Stockholm nung zünga metetdaksü.

Taküm Nobel Prize in Physics angur Pierre Agostini, Ferenc Krausz aser Anne L'Huillier nungeri electrons kanga kera senzüba putettsüsa 'super-fast bursts of light' yangluteta liasü.

"Anne L'Huillier-i gas nung atoms den 'laser light's interaction' nungi effect tasen ka ngutet. Pierre Agostini aser

Ferenc Krausz nati ibaji 'pulses of light' tatsüba adokdaksüba nung amshitetsü ta sayuteta liasü," ta Nobel Committee ajanga osangbener senden ka nung ashi.

Noble gas ka alema infrared laser light yaloktsüdang tesangwa sentsü balala adoker ta Anne L'Huillier-i bushitet. Noble gas ya helium (He), neon (Ne), argon (Ar), krypton (Kr), xenon (Xe), radon (Rn), aser oganesson (Og) nungertem alitsü.

Nobel Prize in Physics sempet angur tetsürtem rongnung Anne L'Huillier ya pongububa alitsü.

Pierre Agostini-i attoseconds 250 tashi adokba light pulses yanglutet aser Ferenc Krausz-i experiment dang aka nung attoseconds 650 tashi adokdaksüba single light pulse bushiteta liasü.

(Maneni tapak 8 nung...)



Mexico City kübok Tlatelolco plaza nung kaketshir yimjung nung longkak aita alidak sepaitemi injang khalokja kaketshirtem khaseter küm 55 ajungba anogo nung nüburttemi yimtung süa jajadang police den raratepa liasü.

NSF Trophy: Red Scars quarterfinal-i iogo



Kohima, Mongputeni/October 3 (TYO): Mongolbarnü NSF Martyrs Memorial Trophy nung Red Scars-i asaya koka quarter finals tongtetogo. Iba asayamung ya Angami Students' Union-i ayongzüka IG Stadium nung asayadar.

Round of 16 nung tatembangbuba asaya asayaba mapang Red Scars puri goal 2-0 agi Viswemi FC koka liasü.

Asaya nung Sentilong-i (66) minute 17buba nung mezüngbuba goal idaktsü aser Yhunshalo Kemp-i (9) minute 65buba nung tanabuba goal idakja parnoki asaya koka liasü.

Asaya atema Red Scars FC nungi asayar Horlan (16) nem ASU Games and Sport Secretary aser Organizing Committee Secretary Metebo-o Sote-i man of the match

naroküm agüja liasü.

NSF Trophy Quarterfinal fixture:

- 1) New Market FC Vs A Yhome FC, Oct 5; 5 pm
- 2) End of an Era Vs Liangmai FC, Oct 6; 5 pm
- 3) Azufü Football Academy Vs United FC Piphema, Oct 7; 5 pm
- 4) Football for Change Academy Vs Red Scars FC, Oct 9; 5 pm.

Asian Games: Parul-i gold aser Arjun o Sunil nati bronze angu

Mongputeni/October 3, 2023 (Agencies): Hangzhou, China nung tanga asaya aliba Asian Games nung Mongolbarnü India tsür Parul Chaudhary-i tetsür 5000m asemtepbba nung gold medal nguogo.

Tetsür 3000m steeplechase event nung silver medal anguba sülen anogo ka lir Parul-i gold medal ngutetogo. Lai 15:14.75 nung alizüing tongteta India asoshi gold medal 14buba ngua liasü.

Mongolbarnü ano Arjun Singh aser Sunil Singh Salam nati tebur canoe double 1000m final nung bronze medal ka nguogo.

Taküm Asian Games nung tang mezüngbuba India nung asayartemi Canoe Sprint nung medal ka nguogo aser 1994 küm Asian Games sülen tang mezüngbuba iba asaya nung medal ka ngutetogo

India nung tarep yagi 3.53.329 nati alizüing tongteta tasembuba jenjang nung tembanga liasü. Asaya nung Uzbekistan nung tarep



Parul Chaudhary

Shokhmurod Kholmuradov aser Nurislam Ugli na India nung tarep jakdang mezüngbuba jenjang nung tembanga liasü.

Kasa asaya nung Kazakhstan nung adianu Timofey Yemelyanov, aser Sergey Yemelyanov nati silver medal angu.

1994 küm Hiroshima Asian Games nung India nung Siji Sadanandan aser Johnny Rommel nati iba asaya nung bronze medal ka ngua liasü.

India nung asayartemi Athletics nung maneni kanga junga asaya Mongolbarnü ano silver ka aser bronze medal ka

nguogo.

Mohammed Afsal-i tebur 800m race nung silver medal nguogo. Pai 1:48:43s nung alizüing tongteta iba asaya nung tanabuba jenjang nung tembanga liasü.

Iba asaya nung Saudi Arabia nung asayar Essa Ali S Kzwani-i gold medal ngua liasü. Pai 1:48.05s nung alizüing tongteta liasü.

Kasa mapang nung Praveen Chithravel-ia tebur Triple Jump asaya nung bronze medal ka nguogo. Pai point 16.68 nguteta tasembuba jenjang nung tembanga liasü.

Chithravel-i, Buenos Aires, Argentina nung 2018 Youth Olympic Games nunga bronze medal ka ngur liasü.

Maneni Annu Rani-i tetsür javelin throw asaya nung gold medal ka nguogo. Lai nület meter 62.92 atsüba sülen iba medal ya ngua liasü. Iba asaya nung Sri Lanka tsür Nadeesha Dilhan Hatarabage Lekamge-i (61.57m) silver aser China tsür Huihui Lyu-i (61.29) bronze medal ngua liasü.

Nisung asem nem 2023 Nobel Prize... (Tapak 7nungi...)

"Attosecond ya kanga tatsü lir aser second ka nung aliba attosecond ya küm billion 13.8 jakdang alima aser nungjang-petinu poktetba sülen züngyonga aruba seconds tem den kasa lir. Takdang ka nungi külen jara nung tesangwa yaloktsüba ya attoseconds billion ter agir," ta Nobel Committee ajanga osangbener senden nung attosecond tetetzü rateta ashi.

Nobel Prize in Physics ya inventor aser industrialist Alfred Nobel-i 1895 küm tentetba Nobel Prize tem tematiba rongnung ka amai züngshir aser iba sempet ya physics nung researchers aser scientists tem nem agüja arur.

Nobel Prize for Physics ya 1901 nungi küm shia agüja arur.

Nobel Prize in Physics mezüngbuba ya 1901 küm Wilhelm Conrad Roentgen-i

X-rays yanglutetba aser Henri Becquerel aser Pierre Curie nati radioactivity nung research agi tenzükba asoshi agüja liasü.

Hombarnü Nobel Prize for Physiology mesüra Medicine sempet ya Katalin Kariko aser Drew Weissman na nem agütsütsü sangdonga liasü, shirnoki COVID-19 asoshi mRNA vaccine yanglutsü lenmang lapoka liasü.

3buba Kohima District Chess Championship ayonger Dimapur, Mongputeni/October 3 (TYO): Kohima District Chess Association-i ayongzüka, October 13 aser 14 nü Nagaland Olympic Association Complex nung 3buba Kohima District Chess Championship asayatsü.

Asayamung nung shilem agitsü jangraba Kohima district nung alir tem asayamung nung shilem agitsü asoshi jaokogo. Asayamung atema tenüing züngoksemtsü asoshi tejangrartemi iba number;

7005694541 nung tongteprateptetsü, mesüra Northern Sports, CANSSEA Building nungi form agizüka benoktetsü.

Asayamung nung shilem agitsü asoshi senior category asoshi taa sen 1000 aser under 16 junior category atema sen 500 asütsü.

Maneni osang jenjangjaba agitsü asoshi item number: 7005694541/7640857037 nung tongteprateptetsü, ta asayamung ayongertemi metetdaksüogo.

Santosh Trophy atema Nagaland team sangdongogo



Santosh Trophy atema Nagaland team asayartem aser ketdangsürtem NFA tir K. Neibou Sekhose den tangokba noksa nung angur.

Kohima, Mongputeni/October 3 (TYO): Santosh Trophy atema Nagaland team October 4 nü apusoa aotsü.

Nagaland Football Association (NFA)-i ashiba agi, Santosh Trophy ya Greater Noida, Uttar Pradesh nung October 8 nungi 17 tashi asayatsü.

Nagaland team nung ketdangsürtem rongnung manager Mughato Ayemi, head coach Roko Angami, assistant coach Avar Danla aser physio Zakielatuo Soletsu densema lir.

Nagaland team nung asayartem:

Goal keeper: Homuka Y. Yeptho aser Dziesengulie Kire

Defender: Lironthung Lotha, Sanyem Konyak, Toka Achumi, Liang T. Khamniungan, Ito Aye, Menoneikho Nakhro, Olando Yimchunger and Puloka Assumi.

Mid fielder: Kevisanyu Peseyie, Kuvezo Vero, Senenlo Kath, Limakumzuk LKR, Kakhevi Assumi, Alapou Kewililakbou, Rotobe Poirang.

Forward: Haileuyibe Iransau, Yhoto Lohe aser Mughapu Chishi.

Seithekiema Circle Sports Meet tenzükogo

Dimapur, Mongputeni/October 3 (TYO): Advisor, Urban Development & Municipal Affairs, Zhaleo Rio-i Mongolbarnü Sovima yimtsüing nung Seithekiema Circle Sports Meet 2023 tenzüktsüogo. Iba asayamung nung yimtsüing 36-i shilem agitsü.

Asayamung lapokba sentong nung o jembiba mapang Zaleo-i, Dr. T. Aolenisüba nung 1948 küm India football team Olympics nung asaya-a state nem konang tetushi bener arutsüba indang jembu.

Northeast nungi asayartem aikati wadang balala nung temaba jenjang tongtetogo ta

shia, asenokia junga dang shilem agidar saka tarutsü nung international jenjang tongteta asayatsü atema lanurtem dak nungi imlar, ta pai ashi.

Asayar tajung ka akümtsü asoshi yimyayimpong aziüktsüji ajak dang tongtibangba, iba den health, libaliro amala yagia tongtibang shilem agir ta ashiba den lanurtem atema basic aser advanced training nungdaker ta Zhaleo-i ashi.

Iba asayamung ya kati ka den metetpelaba mapang tajung ka südakjang ta ashiba den Advisor-i iba asayamung takok ngua ayongzüktebba atema asayamung ayongertem nem tenüingsang agüja liasü.

BILEMDANGANG

"Tila ka dang süaka temeim sayubaji amajok masü."